

國
朝
詞
綜
補

國朝詞綜補卷十八

無錫丁紹儀杏船輯

溫汝科 一首

陳其松 一首

石韞玉 六首
補詞

張若采 一首

萬承紀 一首

左輔 五首
補詞

孫錫 一首
補詞

戴敦元 四首
補詞

葉紹桎 一首
補詞

唐仲冕 一首

汪梅鼎 一首

周之桂 二首

周鶴立 二首

周岱齡 一首

薛玉堂 一首

徐準宜 二首
補詞

黃丹書 一首

汪潮生 五首
補詞

孔憲堃 一首
補詞

李元塏 二首

景謙 一首

黃士珣 三首
補詞

吳登 一首

方若夔 三首

楊英燦 八首

何承燕 四首
補詞

徐達源 一首

溫汝科 字寄匪順德人乾隆五十四年舉人官南雄訓導

西地錦 集片玉詞

小曲幽坊月暗對重門半掩一枝瀟灑嫩梢相觸識秋娘庭院但怪燈偏簾捲恨玉人不見定巢燕子歸來

舊處倚東風嬌嬾。

陳其松

字秋麓鄱陽人乾隆五十四年副貢生
官安徽知府有小草山房詩集附詞

百字令

題嚴小秋詞稿

歲華波逝過江東爭數後來英邁一卷人間新樂府賦
柳豪蘇而外翦燭情深停雲思苦字字都千載卿當獨
秀擅場如此難再還笑黃九多時懺除綺語受了沙
門戒夢斷旗亭沽酒處搖漾春波如海十里珠簾六朝
煙月留得詞人在憑闌高唱頓添多少悲慨

石韞玉

字琢堂吳縣人乾隆五十五年
進士官按察使有花韻庵詞

清平樂

彈絲吹竹花裏人如玉歌徹紫雲迴一曲山與眉峯爭
綠幽情暗惜芳菲醉吟心事誰知謾說湖同西子風
懷不似當時

浪淘沙

春日登樓作

細雨溼簷花畫鼓頻搗登臨有客苦思家芳草不知人
意倦綠徧天涯江上數峯斜雲樹周遮青春楊柳白
門鴉算取交通吟別後幾度韶華

滿江紅

廣陵

百雉臨江依舊是綠楊城郭看處處絲清簾脆銀燈珠
箔明月二分秋有恨瓊花一謝春無著但孤舟敲枕聽

寒潮還如昨 迷樓石苔痕駁平山樹鵲聲惡笑人生
幾箇腰纏騎鶴三閣吟詩同向盡六州聚鐵終成錯算
從來兒女與英雄都零落

三妹媚

斷腸芳草碧況關山千重又逢離別冷落天涯悵隔花
人面杳無踪跡依舊秦淮何處問桃根桃葉莫唱梁州
三十潘郎鬢絲黏雪 回想西園當日恁卷幔呼燈倚
闌吹笛不料而今但一分流水二分明月幾許淒涼相
伴我淮南江北博得潯陽司馬青衫淚溼

菩薩蠻

對菊

孤鴻一點難成字
慄慄夜飲人無寐
髹几疊成山屏風
幾扇彎
澄心牋似雪
銀燭秋光潔
花影甚婆娑
其如人瘦何

金縷曲

送顧洲碧之成都

太息分襟驟憶春
明花南硯北
兩人邂逅客裏過
從親串少消遣
晨瓜夜韭
怎又上河梁
攜手我住金華君入蜀
再相逢知否
人依舊
風雨夕一尊酒
峨眉山甲寰中秀
勝尋常
薊門霜草蘆溝煙柳
萬壑千巖攢劍閣
都助奚囊錦繡
況絮影萍香時候別
後詩篇勤寄與
并郵籤三歲藏懷袖
燕趙侶重回首

張若采

字子白婁縣人乾隆五十五年進士官甘肅知縣有聽雨樓詞

百字令

題石劬師賞雨茅屋圖

綠天掀破看一番風過千聲旋續屋上三重愁捲去苔
罅跳珠盈斛牆簾楊枝隄濃草色詩意蕭齋足山頭神
女珮環來慰幽獨最喜愁境尋歡喧中習靜靈府虛
如谷插架圖書三十乘消盡炷香清福試了琴磚補將
窗紙緩緩排棋局雅人深致儘教收入綃幅

萬承紀

字廉山南昌人乾隆五十七年副舉人官南河同知

轆轤金井

白雲堆絮問西風畢竟幾時吹去臘有涼蟾尙窺人羈

旅天涯俊侶記共聽梧桐秋雨奈到而今賓鴻客燕都
無憑據情絲繞暗牽縷縷嘆香消鏡冷無限悲楚舊
夢零星恁斜陽無語蘆花雪聚又簇起愁苗如許水面
波寒山眉黛淺斷鴻何處

左

輔字仲甫號杏莊陽湖人乾隆五十八

年進士官湖南巡撫有念宛齋詞

阮郎歸

中秋時在保陽

碧天渺渺路何窮吹來兩鬢風小屏華骨冷芙蓉和儂
風露中清吹歇綵雲空殘燈黯不紅歡場也覺太匆
匆嫌他酒未濃

蘇幕遮

玉波寒羅袂溼怕上高樓閒並秋花立衣蝶香銷簫鳳
澀好夢都闌鬢影風吹急 悄難言愁不歇此意沈吟
畢竟和誰說要識阿儂心曲折除向迴廊看取闌干月

六么令

繡毬

梨花過也柳絮又看舞阿誰滴珠團粉端正倚妝戶說
是春魂易斷金屋嬌無主冶煙飛處勾來明月要共春
人夜深語 前夜丁香細結密意留將住今夜晴雪成
堆任意開將去準待屏風十二好夢深深與也無心緒
哀絲豪竹只有團圞舊情訴

垂楊

秋柳同錢黃山賦

年華易老看碧柳依依得秋何早春水樓臺也曾好夢
勾留到芙蓉泣露臨清曉盼不著一絲顫裊空條帶
箇歸鴉更襯些衰草 況是離愁難了趁古堠殘霜亂
山斜照那不銷魂者般憔悴原知道相看漫訝煙痕少
是鏡裏春人畫稿間可能風信吹回依舊好

湘春夜月

戊申元夕泊沙市

正停橈冰輪湧出層霄沙市恰對荆門燈影滿江拋隱
隱簫聲吹起又銀花迸出轉過林坳想鬧蛾門巷傳柑
兒女笑語聲嬌 沈吟暗想華年電掣舊夢煙銷又向
天涯拋擲卻今年初度三五良宵低徊孤影共嬋娟冷

蕩寒濤。倩若箇、把春魂勾轉。趁些風信，吹上梅梢。

孫

錫

字雪帷，仁和人。乾隆五十八年進士官甯州知州，有韻竹詞。

一枝春

鄰苑落梅，越垣而墮。

窺宋牆低，翦輕寒、瘦影颺來。鄰苑羅浮，飛度好夢有人先斷。零蜂賸蝶，算難把、倩魂拘管。閒自放、翠靨流春，笑似絮泥沾慣。銷寒記邀芳，讌愛荔垣斜倚，檀深螺淺。蓬踪梗跡，最礙白雲千片。惺忪往事，付橫玉幾聲嬌怨。開曉幕、影退花磚，凝眸數倦。

戴敦元

字金溪，開化人。乾隆五十八年進士官刑部尚書，謚簡恪，有溫塵詞。

眼兒媚

柳

和煙滴翠未成絲長記早春時娉娉嬝嬝慧流嬌眼秀
入纖眉清秋燕子還來去對影共依依露團不住風
梳不起只耐相思

采桑子

紗窗月暗風聲驟淚結紅冰香退青綾贏得新愁較舊
增人閒路比天還遠夢也無憑睡也何曾挑不成花
一點燈

減字木蘭花

金風玉露秋正佳時人卻去雙槳孤鐙望斷遙天雁一
繩花閒定憶憑處闌干痕待覓莫道更深別酒無多

緩緩斟

步蟾宮

宿醒未破窗催曙聽枝上聲聲杜宇三分春色二分過
便苦勸不如歸去東風肯戀花閒住算也似天涯羈
旅瓊樓定誤惜花人間後夜相思何處

葉紹榘

字琴柯歸安人乾隆五十八年
進士官廣西巡撫有謹墨齋詞

金縷曲

挨過荼蘼節怪春來畫樓燈影幾番輕別孤館悵悵簾
不卷怕放楊花飛入定添了安仁鬢雪憔悴天涯人一
箇料青衫不爲琵琶溼思往事計何拙尋春偶傍闌

千立又侵階茸茸細草染成愁碧沾盡落紅三月雨不見去年蝴蝶定怪我游踪未歇幾度問春春不應遣深更杜宇低低說羈枕畔正愁絕

唐仲冕

字陶山善化人乾隆五十八年進士官布政使

瑣窗寒

慰嚴小秋悼亡

鏡剖雙鸞釵分小鳳綠窗人去情田玉瘦忍對紫煙飄度浪相傳香能返魂珮環未是來時路想空房舊挂孤檠伴影幾番酸楚
延佇清商譜悔華年錦瑟別離輕賦前身化蝶證到翠奩題句小秋夫人陳澹秋有化蝶尋君恨路生句記手攜魚尾竹竿並無白頭吟作妒更丁甯早種宜男莫把

春風誤

汪梅鼎

字浣雲休甯人乾隆五十八年進士官御史

疎影

爲吳蘭雪題其姬人綠春畫蘭遺跡

拈花人杳倚曲闌十二聽唱悲調記得當年鎔粉研脂
襯出蛾眉纖妙蕭郎欲換青青鬢盼淚眼淒迷仙嶠痛
霎時一現優曇化了斷腸遺照今日圓亭似昔幾回
展卷也惆悵幽抱縹渺驚鴻綠水紅橋莫喚眞眞重到
憑他百日芳魂活總隔著絳紗顰笑好攜歸小閣焚香
別有玉娃傾倒

周之桂

字玉屏上元人乾隆五十九年舉人官安徽知縣有午塘詞

金縷曲

送簡齋先生游浙

春是先生主，怎頻年尋春不倦。又搖柔艣，家有梅花愁
輕別一半嬌波，不語看瘦減。雲英如許，祇有多情新桃
李，逐春風還共尋。南浦楊柳，餞枯枝舞。誰知密意留
行苦，似花神從天暗乞。連宵風雨，煙水滯人，應難出況
是江流寒阻，喚不到吳娘六柱。我本衝泥遙相送，乍聞
言也覺寬離緒。歌水調且延佇。

齊天樂

隨園觀燈時值秋試

小紅歌罷回頭處，樓臺夜光全改。樹挂晴虹，堤排錦幃，
空際繁星如海。嫦娥遠睽也似怯，燈光掩伊眉彩。俊煞

人閒美人名士著宵態 憑闌何限清興怕花閒玉漏
催去環珮班馬嘶餘鈿車散後偏我癡情猶在千秋此
會說不盡風光小樓霞內試驗今年桂香添幾倍

周鶴立

字石臺吳江人乾隆五十九年
舉人官蒙城知縣有匏葉庵詞

燕山亭

題梁溪賈素齋金門秋館圖

如許秋光落葉紛飛客裏愁懷難寫孤館明燈抱膝長
哦想見十分瀟灑剛到重陽又心憶九龍山下休訝只
索徧琳瑯便馳歸馬 自嘆人海蓬飄況蕭索西風送
將行者攜杖尋詩剔薜蘿碑誰似浪仙風雅題罷紅樓
恐樓上有人牽惹歸也應重整碧山吟社

周岱齡

字延卿號介堂祥符人乾隆五十九年舉人官保定知府

八寶妝

山陰陳翼子得古方鏡云出古墓中墓磚有天康字按陳文帝改元天康蓋六朝時物賦詞索和余倚是解

翠簿承塵銀華蝕土一片南朝月冷飛上棠梨雙蛺蝶
零亂隔江花影歌殘玉樹最憐金盃淒涼金陵王氣銷
沈盡賸有興亡遺鑑芙蓉睡醒此日繡滿苔痕繁華
舊夢擘箋人在荒梗念誰伴青燐碧草只堪字天康堪
認好攜向畫屏重整蟾蜍細細瑩珠粉試照徧秦淮菱
花悵斷胭脂井

薛玉堂

字畫水無錫人乾隆六十年進士官潁州同知

沁園春

閨秀徐叶英字梅軒南海人山陰何綱文客粵娶爲室何母爲聘同邑胡氏而不知也居十年與二子同歸山陰胡父謀出前婦許以女歸母乃逐徐及其二子叶英寓居邑之菩提庵賣卜自給後其弟夢山聞之來訪始謀歸粵所著有梅花百絕并雜稿三卷語多悽惋見者憐之吳君松厓爲賦是解余亦繼聲

天遣飄零越水吳山故爲壯游
悵馬卿歸去拋殘蜀錦
鳳簫吹斷淒絕秦樓
黯淡簾旌青熒龕火一瓣蓮花
世界留傷心處是兔絲顛倒覆水難收
雲山此日凝眸
有雁侶風霜結去儔
正聲停錦瑟啼烏泣露歌成紈扇
長簾驚秋夢憶江南人歸嶺左驛路梅花寄隴頭西風
緊怕秋心暗寫字字成愁

徐準宜

字仲平武進人乾隆
六十年舉人官治中

鵲橋仙

午風釀暖輕陰送冷做得韶光如許一分絲雨二分煙
還引起十分愁緒無情春去有情人苦飛燕雙雙自
舞思量無計阻春歸空目斷連天芳樹

燕山亭

題洛神畫幅

霧織輕綃霞綯華裾隱約驚鴻飛度微步淩波掩抑含
愁羞學漢濱游女世外幽姿渾不藉明璫翠羽誰悟有
千尺深情陳思難賦不是凝睇無言算說盡閒愁有
誰聽取月冷芝田風淒玉佩何時遇他交甫約伴清游

賸幾箇舊時儔侶休訴任洛水滔滔東注

黃丹書

字虛舟順德人乾隆六十年舉人官開平訓導有鴻雪齋集附詞

滿紅紅

木綿花

誰把猩紅徧灑向高枝嫩萼人道是炎官火傘張來參
錯望去晨霞標乍起看同海日光齊躍笑紛紛桃杏鬪
春妍都纖弱 侘城畔濃陰薄黃灣外新綿作問蘆花
柳絮可能相若野燒連空煙易散清霜夾岸楓初落儘
畫家渲染有胭脂應難著

汪潮生

字飲泉儀徵人乾隆六十年副舉人有秋隱庵詞

聲聲慢

題郭頻伽填詞圖

花閒度曲。鏡裏傷春。銷磨鬢影年年。付與瓊簫。二分明月猶圓。依稀舊時曾見。倚高寒。吹笛梅邊。清宵永。又玉人何處。喚起詞仙。只有惺忪一點。怕梨雲都化殘夢如煙。誰譜離情。酒痕零落尊前。應憐小紅低唱。過垂虹亭子依然。尋舊約。待重來。書滿錦箋。

湘春夜月

題潘湘雲遺像

最銷凝。東風吹瘦春痕。可奈錦瑟空憐。寂寞舊歌塵。閒取相思甚處。但玉環飛燕。尙繫羅裙。嘆酒醒日暮天涯。不見誰共清尊。郎踪似絮。儂心似水。殘夢如雲。翠袖伶俜。空倚著玉梅花影。憔悴芳魂。天寒月落到此。番消。

盡情根舊恨遠祇盈盈畫裏香熏小像留伴黃昏

百字令

漏聲初轉又風聲吹起夜痕愁絕殘夢驚回無覓處一
枕春心寒怯繡幙低垂銀屏靜掩都與東風別月明如
鏡向人依舊圓缺空念望斷天涯春光無奈消息從
誰說不聽子規腸已斷況是三更時節燈穗斜飄簷鈴
倦語早有敲窗葉樓空人悄笛聲還又嗚咽

木蘭花慢

秋感

是誰家長笛做弄出一天秋早珠露盈盈銀河漾漾挂
上簾鉤勾留野鳥並影數星期何處問牽牛難道徘徊

不見空傳玉宇瓊樓。盈眸芳緒總悠悠。鎖日幾回頭。
但柳又輕黃。蕉仍重碧。聊與綢繆。知不歲寒耐守對寒
梅。方許著春愁。誤了一生蛺蝶。前生誤了莊周。

大酺 寒夜

正漏將殘。燈初灺。蕭瑟寒生孤館。幽懷何處託。倚參差
闌檻。月高天遠。秦鏡光寒。吳鉤佩冷。都是曾經淒怨。來
朝有良約。便遙遙聽到曉鍾敲斷。怕啼鴉聲多。亂鴉飛
去。曙光猶淺。伊家清夢轉。碧雲外。薄霧吹成片。且細
把心香爇了。一縷如絲。更誰來。雙紅添滿。獨自思量久。
裁一尺。素練題徧。況零落。霜華晚。今夕何夕。都負年時。

鶯燕。畫簾幾重不捲。

孔憲堃

字厚齋曲阜人乾隆五十三年
臨雍授州判有逸友堂詞

浣溪紗

花半開時酒半醺。碧闌干外步逡巡。
薄寒天氣豔陽春。
樂府空憐劉碧玉，美人還憶薛靈芸。
閒中贏得暗銷魂。

李元塏

字湘芷長洲人
官兵馬司指揮

百字令

秋夜坐月有懷

梧桐一葉趁西風。吹落便成秋意。
石砌蕭疎花泣露寒。
月雲梢欲墜。玉杵催涼。金蟬咽冷。
併作愁滋味。豆棚坐。

久薄衫吹滿清氣 南望萬疊鄉關故人何處盼斷平
安字竹影橫窗雲一片畫出瀟湘詩思拂石絃琴當風
颭笛觸緒心如醉定知今夕吳郎同此情致

謂吳兼山

金縷曲

關干

宛轉春山角間誰家東風庭院粉纖紅弱花韻依依晴
未午露出眉痕曲曲愛已字玲瓏圍玉小立燕雛閒弄
影蹴疎紅軟踏金鈴索香霧障斷雲觸浪花梔子彎
環拓數相思迴文織就淚珠零落隱約二分明月瘦樹
影參差簾箔又添上一層愁綠回首碧城仙路隔怕春
魂無力尋來錯繾錦字附飛鶴

景

謙

字福泉仁和人貢生官湖南布政使

齊天樂

往歲朋簪游讌多在南湖徐氏水樓倪米樓顏曰華隱宋芝山爲之作圖今爲汪君又村所得出示索題勝地清游疊花過眼漫倚是解能無憮然

匆匆夢影尋無跡依稀幾枝衰柳巷尾侵蕪城根繞綠

曾倚暮寒羅袖簾前垂手聽恰恰鶯啼軟如波溜小筆

留香傳觀休示解裳友名題華隱爲甚惹花枝有意

離了塵垢浴水文鴛棲梁舞燕化作冷鷗相就鐙殘短

漏臙醉墨遺縑任人爭購寄語延君舊情還記否

謂戴金溪

黃士珣

字薌泉錢塘人貢生官訓導

聲聲慢

題孫嫺卿女士雲鵬停琴佇月圖

國朝言系不系一
二
嫩涼庭院薄暝簾櫳鑪煙裊上鬟輕錦薦移來焦桐三尺初橫人間賞音誰是斂羅紉一種幽情猛省處正冰蟾湧出三五方盈待把姮娥喚下早金波乍溢雲葉先明特地要來肯教相伴愁生冰絲況能寫到有姜家鬲指新聲記聽取轉明徽湘月調清

水龍吟

江珧柱

開尊正憶仙姿南風恰送羹材到挂同羊角斂同蝠翼藏身何巧菌但抽丁珂纔留雪搔頭宛肖戒井華淨洗趁鮮漉取冰肌嫩休教老食指頻番動了似償來海珍先報河豚未上荔枝未熟比方誰好酌酒嘗時鳴薑

配後快供吾飽倘西施網得香尖吐處有楊妃較

又
荔枝

憑伊緊感羅囊乳珠難護環妃軟勾圓細數鮮瑩淨剝
袖紗紅卷瓊屑礪餘粉酥融後炊來玉暖更妝臺拈到
猩脣乞取分一點胭脂染憶煞斜陽路晚颭涼波紫
盤低展幾經醞造一番膚凝去聲一番骨換露顆煙包和
香寫入題糕詩管縱分甘未與雁頭箋上也珠璣滿

吳

登

字雲溪涇縣人貢生官中書

沁園春

題墨仙姪課花詞

滴粉搓酥無限閒情含無限思憶宮牆擣笛曾偷法曲

旗亭畫壁慣唱妍詞殘月曉風鴟絃鐵板低度高歌總
擅奇雕闌畔更課花醉月忍負良時深閨韻事誰知
聽鸞鳳和鳴玉漏遲愛江郎妙筆花生爛漫蘇娘巧思
錦織葳蕤羅帳斜褰紅牙輕拍細譜新聲付雪兒還堪
羨羨蠅頭小楷共寫烏絲

方若夔

字依江定遠人諸
生官汀南縣丞

虞美人

歸興

分明一水還家路欲渡無由渡青山怪我不歸來隔著
寒江相待影徘徊離情脈脈無人曉又被西風惱吹
來滿眼是蘆花怕似蘆花踪跡繞天涯

漁家傲

漁舟晚眺

日半銜山天欲暝一江高捲西風緊白望茫茫波萬頃
誰最穩老漁撒網撐孤艇兩岸蕭蕭吹更冷蘆花亂
拂蓬窗靜忽見團團明月影催詩興狂吟喚起蛟龍聽
釵頭鳳

窗紗曉房櫳悄離情細共鑪煙裊窺妝鏡調鉛粉坐依
簾隙海棠風緊泠泠冷春光早音書杳知他別緒添
多少無聊甚閒時悶花朝何日試猜芳信近近近

楊英燦

字蘿裳金匱人
官松潘同知

點絳脣

寂寞春閨含情斜凭闌干亞燕歸芳榭故把珠簾下
銀鵬煙消嬾得添沈麝妝初卸海棠香謝又是黃昏也

蘇幕遮

鬢雲鬆眉黛斂百褶仙裙不耐東風颭蓮步纖纖羅襪
淺纔解相思已覺腰肢減 麝煙凝螺榻掩小院春深
遲日鶯花豔午夢初回憑畫檻一縷柔情薄暈潮生臉

采桑子

擁衾坐到三更盡玉漏丁冬簷馬丁冬無限相思魂夢
中 年年總是傷憔悴春也愁儂秋也愁儂秋葉春花
各自紅

鵲橋仙

眉峯愁鎖腰圍病減。悔把相思縈惹。燕歸盼到雁來時，好容易挨過一夏。欲將書寄幽情，怎訴幾度沈吟難寫。無聊脂粉也慵施，人卻道淡妝更雅。

眼兒媚

桃花紅雨綠楊煙。春到十分妍。踏青堤畔，簸錢堂上，咏絮庭前。日長休教清閒過，最好是今年。彈來碁局，學他簫管，戲到鞦韆。

憶少年

一榻殘書滿庭秋草。半窗涼月。宵深夢初醒，聽雨聲疎。

密。不是雨聲聽不得。是客懷本來淒惻。鄉愁正難遣。
更邊笳鳴咽。

倦尋芳

洛陽道中清明日作

出山泉濁離岫雲輕。飄流堪嘆。役役程途。節序偏驚頻。
換歸燕引雛飛不定。遷鶯求友聲相喚。最難禁。是清明。
今日短長亭畔。更吹到紛紛細雨。點點桃花。春風撩
亂。好景蹉跎直教行人腸斷。村外宿靑爭賣酒。客中金
熱呼炊飯。據征鞍望江南。故鄉天遠。

八歸

除夕松洲署中作

沿門爆竹長街。簫鼓桃符貼徧年。換官齋寂寂。仍如舊。

只向花前雁後研箋擲管卻憶當時行樂處偏望到江
南天遠最難忘點額新妝豔襯彩旂展 柏酒淺斟玉
笋殷勤爭捧繡幄圍香晝暖盛年難再墜歡難續添出
新愁一段嘆客中滋味多少淒涼有誰伴獨對那寒梅
數點冷落枝頭也如人意倦

何承燕

字以嘉仁和人諸生官
東陽訓導有春巢詞

南歌子

對鏡慵施粉開簾懶上鉤剛和女伴訂春游說起別家
歡會暗凝愁 貪戲拋紅豆含情訴碧流行人消息斷
芳洲只見一行雁字楚江頭

高陽臺

題管蠶日燕磯秋泊圖

漁火連江蘋波漾月布帆又卸磯頭載得琴書三年幾
度來游西風吹老官橋柳望臺城一抹煙浮漫勾留便
是盧家未必無愁勞勞亭畔初揮手想蘭橈一去直
擬歸休靜掩篷窗閒眠好共沙鷗景陽夢斷空樓遠甚
鐘聲偏到孤舟荻花洲纔是新秋已似深秋

望海潮

涿州懷古

江南夢好匆匆歸去前宵初別京華涿鹿故址樓桑舊
址茫茫一片風沙弔古暫停車正酒旗煙暝屋角敲斜
醉問行人昔時屠狗是誰家追思往事堪誇有悲歌

壯士玉貌名娃臺剩華去聲陽亭荒督亢重來我亦嗟
古堞點棲鴉只范陽流水縈帶蒼葭無限離情并隨征
雁繞天涯

眼兒媚

上巳日沙又文招飲海棠下

韶光似水去無情屈指總堪驚前宵寒食今朝上巳昨
日清明 聲聲只勸游人賞柳外有啼鶯一觴禊飲海
棠花下便是蘭亭

徐達源

字山民吳江人貢
生官翰林院待詔

菩薩蠻

迴廊小坐無由並頰窩圓處遙相認花氣撩人香吹來

一味涼

猩紅褰角好淺露驚鴻爪倚暖碧闌干渾忘

翠袖單

國朝詞綜補卷十九

無錫丁紹儀杏舫

張興載

二首

李若虛

補詞一首

馬燦

一首

賈季超

一首

楊搢

二首

仇國垣

二首

錢俊選

一首

周青

八首

張萬選

一首

陳基

六首

范鏜

一首

劉志鵬

一首

方爾騏

一首

陸鎔

一首

汪文錦

一首

朱世傳

一首

方薰

二首

奚岡

一首

姚蘭泉

一首

張祖望

一首

錢東煦

一首

司馬章

一首

蔣思棟

一首

許鎬

一首

羅康濟

一首

嚴廷燦

一首

司馬錫朋

二首

邵鴻

一首

陳燮

一首

孫潛

一首

馬鑠

一首

周霽

一首

戈瑩

二首

馬錦

二首

柴源

一首

陳善

一首

丁 榮 二首

張興載

字甄山號悔堂江蘇華亭人貢生官訓導有繡雲詞

踏莎行

重聽瀏河女子沈素真彈詞

夢去難尋愁來恁遣青棠庭院留歌扇五年絃索惹相思
花前不分人重見浣粉容嬌暈螺眉淺多情鶯舌
惺忪轉禪心已似絮沾泥無端又被東風亂

百字令

惜別

涼生簾隙意難忘人遠中秋時節記並紅闌斜倚處病
淺愁深都說雪逼蟾輝風驚雁影夢雨絲絲歇芳詞填
就新聲清嚼冰雪最是相送江干如珠淚瀉墮水無

從覓爚我扁舟尋舊約親擘濤箋教疊往事分明前期
恹恍苦惜今番別鑪熏鳧藻那容心字香滅

李若虛

字實夫錢塘人官正大
營巡檢有海棠巢詞

少年游

偶拈仁月樓韻

乍過蠶日午晴天人費買春錢燈火星繁笙歌聲脆客
滿畫堂前老年興嬾還多病禪榻枕書眠鼻觀參來
心香定後花影伴鑪煙

馬

燦

字雲題無錫人貢
生官常熟訓導

八聲甘州

與楊蓮跣話舊有感次唱和韻

借蘇臺夢影認楊花點點逐風飛記梅邊索笑尊前顧

曲幾許依依容我冷雪一片雁字向空題閒看游魚戲
蓮葉東西無奈匆匆放棹又珠溪人杳兩處魂迷況
蓬萊悵望山館隔嚴扉恰同似秋來瘦蝶粉香痕零落
謝莊衣空留得一囊紅豆燈畔吟低

賈季超

字雲裝金
匱人諸生

滿江紅

戲贈楊蓮鈺

我欲箋天招桂父問君根蒂可真是蓮花世界校花仙
吏漫去藕絲尋孔宿自來黍夢成炊易放青青兩眼向
人看誰知已詞源倒空依倚詩卷在留天地儘傷春
傷別落花風裏蝶翅影憐雙上下柳腰力怯三眠起只

春蠶自縛太無端君知未

楊

搢

字蘊山金
匱人監生

唐多令

草

舊夢繞池塘新愁特地長
費王孫幾許回腸行徧天涯
渾不斷青未了又回黃
金勒馬蹄香樂游原上忙對
西山脈脈斜陽只有春暉難報
答剛一寸暗心傷

摸魚兒

花魂同蓮趺兒作

恁天生穠姿豔質那堪命薄如許
黃泉碧落迷茫甚回首埋香何處
添淒楚認細草紅心一色臙脂土
零丁最苦念塵夢匆匆靈踪冉冉
可識去來路空延伫浪說

彩幡能護繁華轉眼非故休言情女離來慣爭奈朦朧
無據留不住縱帝遣巫陽招著還防去憑誰說與道緣
斷三生他生未卜已把此生誤

仇國垣

字竹窗鄞縣人貢生

疎影

落梅次姜白石韻

零香碎玉看樹頭樹底寒雨經宿野店孤村瘦影槎枒
幾竿曾共修竹前身隱約君須記想只在清溪南北問
恁時重返香魂好伴箇儂愁獨猶憶巡簷索笑一枝
卻正好斜映窗綠懊惱當時月落參橫偏少藏嬌金屋
羅浮夢斷春無跡更莫問紅闌幾曲又爭禁舊日何郎

袖浥淚痕盈幅

金縷曲

袁陶軒歸自武林出琴瑟在御圖屬題

暗水流花徑正朦朧紗窗向晚芭蕉斜映三尺焦桐閒
弄處兩兩宮商相應還趁著月明風定多少柔情兼密
意一聲聲彈作相思令妝閣畔有人聽鳳釵螺黛雙
鴉鬢湛虛堂翩翩翻翠袖玉闌同凭嫁得詩人袁彥伯一
曲琴心自領休提起從前孤另半載西湖湖上住挂歸
帆紅樹秋江冷偕老願畫中省

錢俊選

字宗企金匱人
諸生有麟機詞

沁園春

題張樂圖詞鈔

無限閒情燕燕鶯鶯光陰擲梭慣春愁幻寄腸迴懊惱
仙音乍譜絃拂修羅三影遙追八叉立就樂府千章不
道多眞堪羨是旗亭按拍句唱黃河 吾曹壯志消磨
縱小技能工窮則那悵後堂絲竹駢羅烏有美人金錯
投贈空歌擬託王昌卻儕平子共賦牢愁喚奈何還堪
惜甚崢嶸歲月硯北閒過

周

青

號木君荆溪
人有柳下詞

浣溪紗

客去淒清不自支竹林閒步漫題詞春來無處說相思
紫燕窺簾聲似剪梨花隔院雨如絲風流空憶少年

時

菩薩蠻

春光分是江南早
新來夢也連宵好
酒醒暗香生
隔花啼乳鶯
黃昏深院裏
裊裊清歌起
歌罷倚闌干
月高羅袖寒

少年游

用美成體

愁雲似障嚴霜勝
雪寒意繞荒城旭
日烘簾東風撲面
春到草微青
有人攜酒尋花柳
沈醉不曾醒
轉眼飛紅無端落絮知否
慘啼鶯

鵲橋仙

花陰黯淡春游岑寂誰管連天風雨惜春何事最關情
只水影蒼茫東去庭深綠草簾垂素月靜夜聲聲杜
宇零星幽夢乍驚回悵不是年時心緒

青玉案

秋蛩

一輪斜月橫窗瘦漸午夜輕寒透好夢驚回濃睡久小
堂深院短檠如豆正是吟秋候淒清苦咽銅壺漏起
擁羅衾攬衫袖舊恨新愁拋卻又碧梧金井綠楊沙渚
人病曾知否

催雪

春雪

花發疎枝風送暗香閒向層巒獨眺算紫燕應來小桃

初笑辦着狂游清興又幾點餘寒隨殘照凍雲一片飛
花捲絮黛痕如掃情繞故園道怕杏臉難回梨魂淒
悄禁脈脈春光暗隨人老遙憶飛瓊靜夜尙小步階前
迎清曉縱此際獨擁虛衾好夢經寒應少

南浦

用程垓體

清夜倚虛窗聽聲聲疎桐葉落如許淡月掛雲端西風
緊吹做一天微雨燈前獨影問誰曾把情懷訴隔簾幾
處還唧唧秋蛩添人愁緒因思一晌飄零嘆羅幙霜
侵繡衾寒妒何日是歸年津亭路猶憶殘春飛絮沾泥
貼水幾回目斷斜陽樹可堪秋暮更玉笛吹來離愁無

數

摸魚兒

聞雁

正淒淒暮秋風緊孤鴻嘹唳飛度征程不怕關山遠獨
影更誰爲侶高絕處有幾點輕霜寒逼凌霄羽還棲別
浦又衰草愁煙荒蘆映月漁笛夜深語休教住似此
北來南去嚴寒避卻曾否天涯空有傳書夢驚斷玉砧
宵雨應最苦便倚徧闌干九曲人何許恁時聽取想彈
鵲情懷祝燈心事都向翠眉聚

張萬選

字懷表
吳縣人

金縷曲

題家樂圃弟女弟子王珮霞咀華詞

誰占吳山秀羨三槐書生不櫛胸羅二酉髻鬪含毫工
咏絮夙慧早傳衆口更兼擅倚聲作手脫盡香閨脂粉
氣溯宗風不數屯田柳紅牙拍是誰授才名吾弟蜚
聲久譜宮商金針度與鴛鴦慣繡記得西河開絳帳有
箇蛾眉小友端合是昭華來又老我江花今欲謝對瑤
篇不禁舒眉縐林下選定推首

陳基

字竹士吳縣人諸生

減字木蘭花

桃根嬌小喚著芳名先覺好燕尾纔分綠覆氍毹一翦
春泥人深坐鶯語能教殘醉破魂爲誰銷背地無端

頰暈潮

百字令

集李湘芷少摩山室酒後玩月

盈盈三五喜嫦娥捧出瑤臺明鏡纔幾番圓圓又缺時
節早催秋信移席重鋪開尊細酌惜此團圓影荷香沁
暑水風涼過成陣料量今夜妝樓無聊憶遠定捲湘
簾等唱徧刀環新製曲鸚鵡也應愁聽扇拂流螢杯收
清露恐少閒心性誰家玉笛替人訴出悽哽

憶舊游

題永州司馬李虎觀梅梁漁隱圖

記柳煙破月蘆雪圍洲吹笛蜻蜓十載天涯住悵青衫
依舊冷了鷗盟俊游重尋圖畫那不感飄零訝仙吏蓬

萊編蓑製笠也憶鱸蓴 此去瀟湘好問戀翠溪光何
似松陵甚日成歸計坐竹牀蘿屋補註魚經秋潮暗生
沙渚四面棹歌聲準泛宅相隨珊瑚親結寒網星

金縷曲

關干和汪竹素作

畫裏珠簾捲恁玲瓏迴文巾字隔煙宛轉斜度銀牆低
界水涼沁陰陰苔蘚畧不礙穿林雙翦綺閣三重廊十
二訝吹來絮影和愁滿惟撩亂看花眼 春寒惻惻扶
應倦最淒清梧桐古井藤蘿池館記得尋詩曾繞徧徙
倚渾忘近遠忽回首一痕紅斷此夜月明羅袖薄悵玉
釵敲折誰爲伴看點點露光泣

又 花影同內子梅卿作

未肯全身露最難忘神光離合乍相逢處不信有人偷
解珮微步臨波延伫怎耐得春寒如許梁燕已歸蝴蝶
倦只斜陽一抹猶憐汝情脈脈悄無語 圖成沒骨留
仙住怪宵來蘭釭初燼欲拋人去記得投懷依傍近和
夢和煙栩栩幾錯認離魂倩女試把芙蓉還自照嘆空
空色相渾無據月未落儘容與

又 花魂同楊蓮跣作

翦紙招無計怪金鈴生生驚散霧輕煙細飄泊天涯渾
不定慣逐游絲搖曳問當日埋香何地修到神仙仍是

幻訝眞眞千徧呼難起憑蛺蝶認棲止
會須倩夢相尋耳最銷凝踏青時節落紅天氣巡徧六朝芳草路一片春愁而已知作伴瑤臺有幾稽首東皇深護惜好留他穩住芳叢裏風料峭怯寒未

范

鏞

字曉川鄞縣人諸生

滿江紅

浪跡邯鄲匆匆裏又過寒食看次第花風吹徧韶華漸歇蟻綠朝酣藍尾酒鵲紅夜灑枝頭血問一年能有幾多春空愁寂
陰陰絮飛如雪絲絲雨紛如織豈東皇有意將春磨滅燕剪銛於魚腹七鶯簧妙似柯亭笛悵

人生好景易蹉跎何多說

劉志鵬

字霞裳餘姚人諸生

千秋歲

郵視隨園先生

八旬遙祝占盡清華福瀛洲侶留公獨才名聞薄海著
述堆盈屋冷眼閱滄桑幾度遷移速久矣忘蕉鹿何
處來榮辱書萬卷棋一局相莊同白首後起邀青目春
正好百花香氣瓊樓簇

方爾騏

號雲巢江甯人

蘇武慢

招同洪梅溪武次雲泛舟西湖

一葉輕舟一枝柔櫓恰受雨三游侶鞞紋皺碧螺黛堆

青人向畫圖中去君吹短笛我唱新詞蕩入亂紅深處
卻無端花外聲聲又被流鶯喚住 悵而今鷺嶺猿哀
孤山鶴杳寂寞慵尋歌舞者般風景如此湖山爲問煙
霞誰主只有年年多情社燕來伴柳風花雨莫更過蘇
小門前芳草斜陽黃土

陸

鎔

字荔生里
居未詳

金縷曲

題潘湘雲小影次王蘭泉韻

燭冷紅銷影怕重拈傷心詞句倩誰調潁惆悵彩雲容
易散難把離魂喚醒應記取夜闌相並私語尙留香案
側痛三生石上霜華冷年時事可堪省 雙修福慧原

難準認依稀同心好夢幾時重訂淚瀉秋墳衰草徧何
忍再描雲鬢空憑弔才人無命依約暗香殘月下任梨
花泣雨愁題詠誰更與薦新茗

汪文錦

字繡谷里
居未詳

摸魚兒

爲胡眉峯題潘湘雲夢影羅浮小像

感飄零桃花命薄半生墮棄如許無端觸我衷腸斷都
作愁風怨雨吾與汝怕淪落天涯同是傷心侶有懷漫
吐歎舊夢全非歡場頓歇此恨向誰訴堪悲是杜牧
三生漫詡卻教飛絮無主芳容便得人憐惜留取朱顏
如故嗟自誤任商婦琵琶難寫其中苦美人黃土問楊

柳門前梅花樹下可是瘞香處

朱世傳

字繼武
吳江人

百字令

兀然枯坐正排雲雁過咽風蛩響對此茫茫生百感偏
把少年追想杯舉秦樓簫吹吳市人羨黃河唱龍門天
半看來高只尋丈詎料柳眼難青蘆頭易白老屋長
教仰不死雄心時拭劍無用還同空掌紫岫凝霞清潭
映月宋玉懷聊放一聲長嘯撲來簾外秋爽

方

薰

字蘭坻
石門人

滿江紅

短檠

獨夜誰親惟雁足光搖耿耿頻數盡寒更三五歌殘酒
醒有客臨書東舍火何人背雨西窗影慙關情一片玉
荷前閒愁并射簾額晴虹罔黏燭淚飛蛾粉照此時
幽獨寸心堪省素雪將侵潘岳鏡黑甜未遇盧生枕只
消磨風露憶中宵秋雲冷

奚

岡

字鐵生新安
人寓居錢塘

菩薩蠻

題郭頻伽盟鷗圖

遙知白石尋盟處蕭疎楊柳垂煙暮分得白鷗沙一溪
紅蓼花輪君攜野艇幽夢和秋迴隨意與題詩雨斜
風細時

姚蘭泉

字亭哉南匯人貢生有秋塘詞

滿江紅

題汪槐谷簫雅詞

似我酸寒眞合住三家村裏欣捧得新詞盈帙一何清
綺北宋南唐多作者東山西麓推之子恨年來無計慰
離愁思秋水鷓鴣與蟀憐飛矢茵與溷驚凡卉看閒將
鼓吹頻移宮徵芸閣甯論歌頌手花閒聊奏文章技只
罪罪玉屑灑瑤林誰堪擬

張祖望

字葭村嘉興人

百字令

湖上留別

湖頭小住又匆匆過了燒燈時節不道分襟當此際偏

是斷腸春色粉蝶黃蜂天桃穠柳好景今虛擲
聽一聲聲是嗚咽
總然尺素傳來新詞遞去何似休
相別後夜孤舟添寂寞
有今宵明月畫閣幽懷青山
別夢料也同瀟絕幾時良晤好將離緒重說

錢東塢

字問山江蘇華亭人
諸生有坐花小築詞

臺城路

自題坐花小築

眾香鬧到春分後
苔茵落花鱗比綠
暗窗紗紅明屋角
白袷朝來初試石臺香
膩恁曲彖闌干側
安斜砌活火
聲中一甌閒品露芽味
今年新種芍藥牡丹相軋處
蓓蕾生未夢裏尋詩酒邊讀畫
滯煞蝦鬚風細藤陰小

想怎闊絕良朋足音時至一曲瓊簫翠屏還獨倚

司馬章

字石圃
上元人

浪淘沙

春到鳳城中游興方濃閒來指點小橋東曾是當年心
醉處蛛網塵封人去翠樓空聚散匆匆今年花似舊
年紅可惜如花人不在欲折誰同

蔣思棟

字松雲秀
水人諸生

百字令

江南三月看家家閉戶紅蠶初浴半暖半寒天氣好靜
聽鳩鳴屋角蘆箔低遮葦編重疊蟬動方盈簇剪刀聲

脆柔桑頓減濃綠 從此姑婦辛勤終朝護視漸喜三
眠熟采葉僮歸頻囑付整頓山頭宜速煮繭風香繅絲
車響不異秋成樂中宵篝火女紅更理機軸

許

鎬

字心泉
秀水人

東風第一枝

十里殘紅一鞭晚照惱人春色如許酒旗搖曳風前可
有當鑪眉嫵征鞍少住正隔巷簫聲徐度怪流鶯不解
春愁爭向花閒來去 且莫問桃根古渡更休話後庭
芳樹試看如畫遙巒猶帶六朝煙雨玉樓人醉想倚徧
東風何處賸依依夾岸垂楊還似當年張緒

羅康濟

字公亮吳縣人
通州籍諸生

菩薩蠻

秋夜有懷

紗窗風送流螢聚黃昏幾陣瀟瀟雨雨過月窺牆一枝
花影涼花陰曾共語共語人何處獨立憶年時安仁
愁鬢絲

嚴廷燦

字曝初直隸
通州人諸生

蝶戀花

借張禹金蔣德融小飲虎邱酒樓

鳥勸提壺花似綺海湧峯頭景色三春麗霸主雄圖消
歇矣當年枉吐如虹氣縹緲高樓巖壁倚沽酒澆愁
吟興飛天際醉舞便思抽劍起不應早把魚腸瘞

司馬錫朋

字賓惠金匱人
諸生有醉艇詞

畫堂春

題合樂圖

誰拈紅豆擅風騷
畫闌風細聲嬌
滿湘翠管紫檀槽
分付雙喬
試聽塞鴻徐引
更看彩鳳頻挑
參差玉筍小
櫻桃一樣魂銷

浪淘沙

秋雨

淅淅響空簷
怕溼重簾挑殘燈
蕊覺寒添窗內愁人窗
外雨一樣慊慊
心事任猜嫌
淚浥青衫一天涼氣晚
風尖著箇銀蟾秋
尙慘況恁廉纖

邵

鴻

字晴江江
都人監生

鳳凰臺上憶吹簫

馮君海晏工詩文篆隸出示詞稿題此奉贈

胸有千秋詞傾三峽筆端蘊釀風雲儘紅牙細按綠蟻
頻傾一霎宮移羽換談笑處石破天驚分明是飛來塞
雁轉去春鶯移情別饒奇境將掃盡塵氛更掃千軍
恍月明星淡身到蓬瀛借取湘靈錦瑟賡一曲江上峯
青應不數雙鬟賭歌畫壁旗亭

陳

燮字秋史吳江人諸生

菩薩蠻

相逢未覺殷勤甚醉來潛替深杯飲暗記可能諧同心
頭上釵生憎簾外雨抵死催人去去後不成眠燈花

紅可憐

孫

潛

字杯湖
元和人

蝶戀花

雲髻垂肩花繞步一桁湘簾窣地深深護又是桐陰斜
過午日長睡起無情緒翠袖冰綃香暗度小摘柔條
綰出同心縷往事淒涼隨水去西陵舊恨憑誰訴

馬

鐸

字讓洲會稽人諸生

點絳脣

簷溜琤琮憑空送到愁千斛繡窗人獨慵譜相思曲
細數歸期已過櫻桃熟彈紅燭燕兒雙宿不覺眉痕蹙

周

霽

字愚谷震澤人諸生

長相思

意難禁夢難尋一穗秋燈暝色深孤眠魂易驚
漏沈沈雨聲聲不管愁人不要聽黃昏滴到明

戈

瑩

字玉封吳縣人監生有陽湖漁唱

採蓮子

祝和傳六月二十四日爲荷花生日賦此爲

翠帔紅裳絕可憐

舉棹

盈盈一水照嬋娟

少年

從知太華峯

頭井

舉棹

原是仙家種壽泉

少年

浣溪紗

綠繡筵囊色尙鮮鏡奩塵滿繡牀閒驚心又是雁來天

眠
殘粉空留金鈿盒濃香已冷玉琴絃半窗明月照孤

馬

錦

字古芸海
甯人諸生

蝶戀花

送春

落絮飛英風攪亂香夢沈沈忽被鶯驚斷何苦歸期難
改換年年勾恨無長短離別天涯全不管好事銷磨
一度匆匆算開到荼蘼芳意滿簾前錯認韶華半

南鄉子

社燕

相見尾涎涎花月今年似去年可惜蒼苔紅雨亂迴旋
遞過重三上巳天庭戶認依然說到盧家夢亦牽蘿

地穿簾波影動翩翩藉爾呢喃話酒邊

柴

源

字石泉桐鄉人諸生有桐陰草堂詞

百字令

顧茶厓囑題鄧尉探梅圖

十年前事記山尋鄧尉衝寒徐步瘦影橫斜修竹外一片冷雲低護溪繞東西崦分上下別有藏春塢霏霏玉屑慣從驢背飛度又道不定巡檐也能索笑卻傍村邊路知是江南春信早粉暈枝枝新露未斷鞭絲將敲帽影夢入涼蟾暮誰家弄笛暗香催拍新句

陳

善

字瓜庭錢塘人

洞仙歌

研花樓記事

入門一笑笑今朝相見數夜金釵卜都驗燒枝紅燭坐
間我何來又何事帶得閒愁閒怨玉杯先已暖粥煮
桃花添煮胡麻半升飯幾幅好詞箋檢點從頭教拍板
還教低按奈歌成聲調只宜秋累桃葉淒然也都腸斷

丁

榮

字子初無錫人諸生

浣溪紗

古浪道中

匹馬駝來萬斛愁萍踪遠逐野雲浮新聲聽到古涼州
迎面晚山含日冷夾車新水帶冰流濃春風景似深

秋

減字木蘭花

爲席靖庵題吹簫圖

流鶯漸老人生行樂應須早柳媚桃夭認取春光塞上
嬌洞簫一曲生綃貌出人如玉莫奏清商且盡花前
現在觴

眼兒媚

天山雪後凍嶙峋寒極似無春推窗試看淩兢梅萼也
減精神拈毫欲賦硯池冰誰繼兔園塵捧教今夜割
鮮行炙醉吐車茵

國朝詞綜補二十

無錫丁紹儀杏舫輯

吳會

補三首

李祥金

一首

錢善繼

一首

金學蓮

補十三首

楊蟠

二首

彭兆蓀

補十一首

周笠

一首

姚宗木

一首

范錯

補十首

施國祁

一首

許乃嘉

補二首

方桂

一首

張衢

一首

俞訥

三首

談承基

一首

李富孫

補二首

史錫賢

二首
補詞

黃沃楷

一首

楊奎曙

二首

汪承達

一首

李 葵

一首

姚秋槎

一首

吳

會

字曉嵐泰州人
諸生有竹所詞

青玉案

秋柳

朝來繫馬長干路但日送飛鴻去薄霧疎煙籠遠樹幾
番換過曉風殘月又是瀟瀟雨長堤一帶銷魂處瘦
碧空蒼頡如許倚徧西風誰是侶晚來還見亂鴉斜照
一片秋山暮

百字令

梨花

夢雲濃裏又幾番。釀出者般庭院。一樣溶溶清夜。月有了梨花。偏豔處處。春風年年寒食。燕子時相見。飛來玉雨。笑他柳絮輕賤。爲甚空翠簾櫳蔚藍天。影總爲花光變。淡到粉香難覓。處林外曉鶯聲斷。軟障樓臺冷侵衣袂。寂寞啼痕淺。箇人何在重門昨夜深掩。

翠樓吟

綠陰

花事纔過。鶯聲漸老。濛濛早又無際。東風何處捲。捲不盡。亂雲似水。和煙織翠。露一角紅樓。便如千里。春歸矣。倩伊圍住。也應無計。猶記前日芳菲。縱留他無恙。干卿何事。風光都換了。還做出十分涼意。曲闌斜倚。便沁

到那人碧羅衫子重提起。殘紅覓徧樹頭樹底。

李祥金

字聚齋嘉興人諸生

蝶戀花

送春

怪煞杜鵑啼太苦。催送春歸。何計留春住。雨雨風風無定處。薜蘿綠徧長亭路。乳燕梁閒嬌學語。蛺蝶撩人。猶傍空枝舞。垂著湘簾天欲暮。亂紅儘逐東流去。

錢善繼

字卓齋秀水人

蝶戀花

春盡日作

七寶車迴桃葉渡。蜂蝶紛紛。魂斷香雲路。只有櫻桃紅滿樹。綠陰深處依稀露。斜日一鞭人影度。馬首楊花。

猶是高低舞莫道東風留不住東風也怕飄零苦

金學蓮

字手山吳縣人諸生有竹西客隱詞

蝶戀花

舸齋寓廬春飲酒閒言湖上杏花盛放越日有尋春之約填此示彭甘亭

酒是吾鄉花是國賦了閒情幾度闌干拍如夢繁華休
記憶年年愁過花生日陌上馬蹄行不得庭院深深
一例傷春色牆外秋千猶寂寂東風千里寒無力

長亭怨慢

開山旅店見燕營巢

漸銜盡漫空飛絮浩蕩關河霎時春暮淺綠長紅夢回
香國甚情緒掠簷飛起渾解得離人語語語說辛勤卻
又是長亭行路小住但春痕細認只在亂山深處長

征夢遠怎沾着碧天疎雨第一怕倦客相逢道還是紅
窗愁侶待兩兩將雛來趁秋風歸去

高陽臺

一捻紅深雙鸞翠蹙酒邊已是銷魂試問前生生來慧
業猶存秋歸歌管闌珊甚剩閒愁付與清尊望湘人一
紙煙波萬竹啼痕天涯到處傷心路又香消燭灺綠
怨黃昏敲枕寒多單袞更有誰溫相逢慣道離時早響
空階落葉紛紛待眠時放卻疏帘關了閒門

卜算子

漢水接江流難翦愁千縷楊柳腰肢瘦楚臺一晌留人

住鎮日落梅風誰把春寒護紅杏闌干翠竹籬記是
經行路

清平樂

篙師夜語聽說瀟瀟雨莫是江南離別處夢也都應歸
去殘燈慣照孤眠閒愁知在誰邊卻道煙波如畫浮
家人自年年

小重山

散了華筵蓮漏沈早知歸去晚怕分襟一街泥滑又陰
陰門前路春雪沒階深坐久峭寒侵身閒無倚著費
沈吟今宵香夢枕邊尋無尋處明日別離心

夢橫塘

燕來同樂元淑賦

翠眉舒柳。細髮梳苔。曉寒猶在簾幕。社日才過。似省識
經年幽約。紅索秋千。綠陰門巷。最難拋卻。又嬌憨軟語。
鎮日呢喃。歸來晚。還低掠。驚心舊壘都空。擦愁來黯
淡。酒醉斟酌。算過歸期。春只在綠楊城郭。剛紅杏繁枝
正開。倦眼還明認樓託。夢斷江南。碧天人遠。說離懷偏
惡。

踏莎行

春困醒難閒。愁遣未房櫳。鎮日簾垂地。別來約略幾多
時。眉痕淺淺。深深意。桃葉淩波楊枝拂水。魚箋沒箇

相思字春歸蝶亂更蜂狂海棠濃睡醺醺醉

六么令

三月六日舟過淮安西湖翳不得一遊程氏園

一春蓬背休問春消息生來愛花心性慵聽倚風笛長
是浮萍逐浪野水無情碧可憐相憶柳絲千縷肯向長
亭繫行客還想園林幾處草暖鋪瑤席記得前度曾
來酒醉留題壁夢入笙歌隊裏不道春岑寂鬢雲蟬翼
羣愁殢恨幾點蒼苔舊時跡

虞美人

邳州舟次見玫瑰花

村荒地僻無花賣不信春猶在分明紅瘦綠初肥幾度
留人瑣碎刺羣衣銀絲絡索金釵襯記上春人鬢而

今開落酒杯中一盞濃香豔說女兒紅

摸魚兒

蓮子

悵紅衣半湖香落擎來猶帶朝露秋殘摘盡空房冷墜
粉一涼如許曾解語是碧藕絲長乙乙牽柔縷相憐記
否但婉轉留青勾圓綻白領略此心苦歸來晚休問
同根伴侶西洲今又飛雨催詩水檻招涼候堆向翠盤
無數吟麗句又相約蓴絲動了江湖趣秋期話與鎮冰
水流是雪花落椀食果試新譜

選冠子

印雲上人贈竹笠用呂渭老體

織箬嫌疎將藤比滑千縷萬絲新製風漪漾綠日影遮

黃偏稱未涼天氣松下夢還鶴唳知秋驚涼妨睡更聽
泉敲頂劬苓穿影上頭空翠應爲我嶽麓緋煙湘江
釣雨同是野懷幽意芒屨一兩竹杖了又夢入亂山蕭
寺惆悵近來禪榻絲飄茶煙香細正月明圓影回首寒
雲無際

臺城路

白舫定生置酒三珠閣勞別芝仙作圖賦此以誌

鶯啼燕掠笙歌夢踟躕欲行還住嫩綠低檐長紅卷幕
禁得清愁如許招邀倦侶趁甕醕初開麝煤猶炷拂起
游塵畫屏來賦斷腸句牽衣似堪細訴者回相見後
直恁無語夜叉將闌春原怕老明日波深南浦林鳩最

苦卻語語催人不叶如歸去則盡銀燈暗窗還聽雨

楊

蟠

字文樸嘉興人諸生有晚香居詞

惜餘春慢

送春

穀雨纔晴棟花初放
驀地便驚春老
畫梁燕子百徧呢喃
似說鬧紅稀少
底事消魂黯黯
除卻流鶯此情誰曉
向東風搔首倚闌愁見
綠陰殘照
憐獨客飄泊東西
團沙聚首每憶故園同調
聯吟竹屋沽酒桃鄉
那得共舒懷抱
今日相思更深別去韶華
幾時重到
算春愁難遣
呼童縛帚落花須掃

百字令

題顧萊厓邵尉探梅圖

虎山橋畔記曾遊鷗侶探梅三度勝地經來勞夢想惜
未爲花題句我嬾重遊君偏乘興獨自騎驢去暗香浮
動縞衣人在前路最好晴雪初消嫩寒未減天色風
吹暮不遇惹春名士到怎把芳心輕露待近黃昏微籠
淡月寂歷宜閒步吟懷未倦再尋西磧千樹

彭兆蓀

字湘涵號甘亭鎮洋人
監生有小謨觴館詞

鵲橋仙

證長鳳脰人長錦瑟敵住玉關風力柔鄉酒國夢溫磨
聽縹緲穿簾一笛霜華漸緊角聲低咽斜月出門時
節高樓已在數峰西又何況樓頭消息

蝶戀花 花朝

姹紫嫣紅開滿砌長晝悵悵春到消魂未天早安排將
息計七分陰只三分霽花似珠娘初墮地酥雨如絲
洗出蘭湯膩院是薜蘿牆牡蠣東風一翦千金意

浣溪紗 月

不要雲衣護淺深晶簾了了夜沈沈露華涼到薄羅襟
玉宇瓊樓千古淚青天碧海兩人心商量爭抵一春
陰

少年遊

自題遊山詩卷

衝波一槳衝苔雙屐衫約綠雲香十載黃塵三生碧落

搔首向斜陽 新詩當作棲幽券歸去好商量采簪生
涯牽蘿家計細與話鐙涼

祝英臺近

蠹蝶爲何夢華賦

認蟲雕猜鳳子天巧遽如許不怕鶯捎好護墨花雨儘
教竹素開園梅苔棲夢抵八幅羅裙化去展芳絮應
笑案上乾螢僵老甚情緒書癖前身台幻采香侶誇他
修到衣魚千年脈望算花底一生輸汝

清平樂

題葉小鸞疏香閣眉子硯銘拓本

綠窗清課珠字留些箇想見臨池雙黛妥照到雲漪一
朶伊人碧海青天餘香誰試松煙勾取遊仙幽夢女

牀山月初絃

齊天樂

江鄭堂繪五更疎欲斷一樹碧無情詩意屬題爲賦此解

陰陰芳樹深深院依依夢魂迴處借蔭吟風驚寒抱葉
斷續殘聲如許疎鐘一杵正渺渺長天亂鴉催曙縱有
高枝滿身風露孰憐汝仙都幾曾化羽只淒淒切切
似怨齊女畫障紗明凝妝鬢薄那有少年心緒綠窗無
語又幾點蕭疎豆花涼雨別館櫻桃黯然秋思苦

又

春夜讀手山少年游詞悄然感均墳此解和之

露華如水天如洗六街蓮漏遙聽酒重黏衫花低壓帽
巷窄獨兒未醒玉羅窗靜恰待燼蘭缸尙支匳鏡傳語

呼茶小紅鸚鵡隔簾應 年年湖海泛梗有傷心影事
腸斷誰省一樣清游依然俊侶換了少年情性眉峰煙
冷指珠斗闌干斜斜整整半晌魂消畫樓殘月影

高陽臺

若冰女士遺照

翦水凝眸積雲髻鬢畫闌庭院春深風絮天涯離愁負
了瑤琴迴文機上珍珠字問幾番傳語青禽鎮微吟明
月樓西羅襪花陰 阿誰腸斷筵篴夢賸悽然遺挂壁
帶塵侵翠石蒼苔衣香何處重尋晶簾數點梅花小尙
依稀瘦影檀心恨難禁碧海青天消息沈沈

摸魚兒

秋海棠

漸秋魂心紅點點啼妝媚楚如許雲散霞盛恨芳砌恨
葉情波無數低泣露耐風色淒迷亞字牆陰暮東君無
主任翦淚爲根裁愁作朵紅顛一痕雨嬌春態不是
華清伴侶夜涼銀燭勤護鮫綃誰搵圓姿臉碧顰橫波
偷注儂和汝算瘦影檀心薄命平分取重門深處囑莫
灑零煙停些嫩月對作斷腸語

金縷曲

徐山民待詔重葺徐侯齋先生祠并以遺像及臨危絕筆台裝素冊索題敬成此詞

繙盡遺民表間空山茫茫甲子過來多少完卻平生臣
子事臨去遺言草草想擲筆凌雲一笑賸有金仙盈把
淚認西風鉛水雙瞳皎還勝似拜朱鳥草堂秋榻靈

巖道有高懷南州徐穉替扶家廟吳苑鶯花渾無限誰
問荒煙斯老共杜宇斜陽相弔小雅離騷情爾爾算風
人心事歸忠孝零粉墨萬年寶

周

笠

字雲巖
吳縣人

南歌子

螺黛顰眉淺鴉黃覆額輕錦箋亂疊墨縱橫學寫蠶眠
小字署珠卿柳外全飛絮花閒尙語鶯愛拈紅豆問
何名話到相思二字已含情

姚宗木

字半林秀
水人諸生

百字令

和陳翼子古方鏡詞鏡出自陳時廢壙中

臨春結綺被西風吹作冷煙衰草只有景陽宮裏月曾
見當時玉貌狎客才華貴嬪顏色一一都知道寒芒四
射豈容兒女輕照誰念古塚塵埋漆燈如夢相對無
昏曉歷徧千年滄海劫依舊清光皎皎螭首蛾眉蓬頭
聾耳同被渠催老何人面似看來還更端好

范

錯

原名音字聲山號白舫烏
程人諸生有茗溪漁隱詞

蝶戀花

春分

小院分明雙燕訴似道韶光半已無尋處十二珠簾雲
影護踏青休把良辰誤杏豔梨香春未暮又見桃紅
次第花風度只有客愁吹不去年年繞徧天涯路

點絳脣

永夜輕寒，^寒臺慵翦燈花。墜蜀箋光膩，學寫相思字。
煙水迢迢，欲寄憑誰寄。春來事滿林紅翠，只有人憔悴。
眼兒媚

落日離亭罷酒尊，煙密鎖林昏。數聲津鼓，一堤芳草，總是銷魂。
休尋枕畔香羅帕，昨夜有啼痕。今宵夢裏相思，兩地各自溫存。

鵲橋仙

飄零書劍，清狂詩酒，不信相如遊倦。憑闌鎮日意恹恹，生怕聽一聲征雁。
愁無人覺，病無人問，靜掩朦朧秋

院井梧初放月痕來又早被西風吹亂

東風第一枝

柳有眉顰桃無靨笑一春愁雨過半曉來纔拓窗紗恰
到去年舊燕呢喃不住似欲訴別情深淺問往時繫綵
人遙遞否數行書簡簾下處翠添徑蘚樓倚處怨傳
鳳管雲山疊疊重重幾度恨迷望眼今宵有夢萬一到
金臺相見又生怕千里東風輕把夢痕吹散

高陽臺

舟泊花津橋過錢聽默舊廬感賦

夢雨無踪癡雲不斷匆匆上已光陰做弄春晴費他柳
色如金畫船煙水飛雙槳向花津橋外幽尋悵誰家橫

笛聲哀歎逝愁深
隔年曾赴迎涼約
記談徵軼事曲
譜新音
更是多情留將琥珀濃斟
重來頓作山河感
過荒廬幾度傷
今況當時低唱人遙獨我悲吟

齊天樂

蟬

一生長抱齊宮怨
匆匆又驚時序
柳下琴音花閒鬢影
記得相逢前度
庭陰向午
聽驀曳殘聲別枝留住
病不巢居
九秋風景占如許
紗窗涼夢斷處
爲伊牽往事
頓起愁緒
薄翼浮征疎陰
滯跡似我天涯
羈旅誰將和汝
有四壁寒蛩共傷遲暮
斷續催他月痕林外吐

石州慢

秋柳

斷縷零絲沒計繫春。收拾秋意。無端碧淺黃深。認取霜痕。初試山亭水驛。慣自送客迢迢。天涯對我驚憔悴。休再去攀條。問那年情事。偏是拖煙潦草。漏月蕭疎。颭風顛墜。玉笛吹殘。忽把離棕喚起。蟬嘶未了。又早飛到寒鴉。爲伊相訴閒愁思。看一尺蠻腰。便瘦來如此。

長亭怨慢

錄別

漸吹起離亭孤笛。酒釀杯深。解愁無力。柳織煙絲。梅飄雪朵。斷腸色綠。波千里。空兩岸。層陰積。小雨又迷濛。竟掩卻一輪蟾魄。江驛聽鼙鼓。忍見片帆飛疾。紅搖燭影。暫雙照此時歌席。待明日。攜手河梁。便惆悵天

涯咫尺况最是難忘別淚春衫痕溼

金縷曲

同人譙集梅子山分賦

野艇瓜皮小問湖邊詩朋酒侶載來多少山水情牽前
度客曾識巖花渡鳥且重上種梅舊島幾點青蒼嵐影
墮正隔江雲樹浮天杪簾捲處縱憑眺浪游人被無
情惱算何如共攜樽俎醉將愁掃聽唱清歌聲一縷韻
入松園竹繞又輕帶疏鐘遠鳥相看鬚眉都灑落便畫
圖添寫西園好揮玉塵飄然笑

施國祁

字北視鳥
程人諸生

杜韋娘

秋日偕王雪浦范白舫訪朱從事朱仁福
墓墓在南潯鎮西妙境庵後旁有墓碣劍

落已甚。爰手拓以歸。各賦一解。紀其事。

煙叢西墅。寒花墓下。秋蕭颯。問宣和從事碑存否。怎忍
令風霜摧拉。喜俊流逸興。長箋拓去。荒磷乍試新氈蠟。
聽椎聲向夕陽裏。丁丁響答。看薄榻模糊蟬翼。重行
泐墨古香襍。恍石街明月遺清景。一水外。潯溪回匝。話
南朝舊事。忠祠孝里。榛蕪半付晚樵踏。好裝池。且與評
泊。吟窗醉榻。

許乃嘉

字頌年。仁和人。諸
生有琴語軒詞。

河傳

秋暮人去。小樓前何處。重尋翠釧花枝。笑我又經年涼。

天擁衾成獨眠 別後相思誰與說簾影隔望也無消息
奈蕭娘沒商量橫塘藕絲都斷腸

滿庭芳

贈別劉芙初

衰草縈青暮雲慘白極目已是殘秋遠天如墨寫得幾
歸舟人世可憐萍梗西冷水只解東流閒凝佇櫓聲飛
處一雁下南樓 悠悠記昨夜鑪煙茗串相對齋頭莫
忘了湖山寒到盟鷗但聽吟蛩淒切闌干外猶訴離愁
憑相約劉郎重到前度夢中遊

方

桂字菽堂
桐城人

望江南

楊州好夜月泛虹橋蘭麝衣香飄綠綺珍珠簾影映紅潮何處玉人簫

張

衢

字越西號情齋蕭山人諸生有翠娛軒集附詞

醉翁操

題友人捕魚小景旁有數童嬉戲

畫工神功玲瓏寫君容猶龍拋除簪紱攜魚筒居然漁父家風如對儂笑道盍相從信樂無央兮此中捉花鬪草忙煞兒童任他聯臂踏徧沿堤軟紅水有時而西東柳有時而疏濃惟君塵界空君今爲仙翁若到武陵中仙源不信無路通

俞

訥

字木庵金匱人

點絳脣

人在天涯倚闌頻把愁眉蹙
舊歡難續春草無情綠
惆悵歸期不似花期速
盤中曲迴文四角先向中閒讀
眼兒媚

庭院黃昏別緒濃
秋影小簾櫳
數聲寒杵一弦涼
月幾點飛鴻
無邊舊事憑誰省
閣淚對西風彈阮無心調
箏轉怯思夢還慵

蝶戀花

月影一簾春寂寂
風暖香消花事全
狼籍恨縷愁絲千
百結
伯勞飛燕東西隔
一去天涯無信息
卻悔當筵

紅豆輕拋擲深夜懷人頻轉側夢魂何處尋踪跡

談承基

字念堂江甯人貢生

臺城路

秋日偕朱戟裳汪朗園宿北極閣清言達曙作秋山夜話圖各題一解

一襟秋思茫無著山中話來偏永樂欲招仙悲疑泣鬼
樓閣齊梁成夢驚颺怒湧便老樹撐空怎禁掀弄砌畔
哀蛩似傳幽怨遞吟諷峰頭誰跨唳鶴把陰霾掃盡
蟾馭呼動露釀巖花名香親炷併作去諸天清供星壇
夜聳耐此處高寒瘦燈堪共睡思騰騰布衾猶愛擁

李富孫

字香泚嘉興人貢生

滿庭芳

顧君萊厓囑題柱陰課子圖爲賦是解

秋氣澄空天香滿院連蜺幾樹成林種分月窟曲徑靄
陰陰位置筠牀石几儘隨意試茗橫琴重分付書籤筆
架移向小山深 盈階紛玉樹青箱舊學好與搜尋看
一經披授珍比籙金更愛垂垂桂子涼風拂亂點衣襟
人爭羨聲清雛鳳招隱不須吟

清平樂

茶匡又以竹下娛孫圖囑題漫贅小令於後

簫簫千箇嫋嫋晴雲鎖活翠暖煙空際墮一片清陰貼
妥 餘芬吹徧堦蘭分甘眞覺顏歡繞膝依依笑語萬
竿鳳子飛翻

史錫賢

字海槎
溧陽人

醉蓬萊

飲治城山飛雲閣待月聽蘭皋道士吹笛

折文窗六扇。袖拂松梢。檻憑煙杪。眞箇高寒。只飛雲能
到。度柳鶯嬌。窺簾燕嬾。見幾人濃笑。忽指高山。垂垂雨
腳。夕陽遮了。此際休辭。清尊引滿。拚向花前。玉山傾
倒。一笛春愁。問伊誰能曉。借筆題箋。燒燈待月。任蓮籌
頻報。待聽更深。瑤壇吹下。步虛聲悄。

燕歸梁

白下車子。尊室方蓮漪。夫人紅蠶閣。遺稿
中有飛入湘簾雙燕子。一銜飛絮。一銜花
句。爲時傳誦。委化後子。尊寫詩意作圖索
題用晏殊體

雙翦翻風度。綺窗曾認合歡堂。剪刀池畔。曉煙涼。窺謝
女倚琴牀。桃花薄命。楊花薄倖。銜處細商量。蘭閣依

舊杏爲梁慙孤影伴蕭郎

黃沃楷

字式方香山人諸生有松谷詩鈔附詞

如夢令

不道春來已久萬紫千紅如繡獨上望江樓綠水茫茫
依舊知否知否只有花肥人瘦

楊奎曙

字容光武進人

虞美人

鎮垂簾押留春久開過荼蘼後堦前檢點數叢花無限
消魂卻憶秦娘家今年不似年時好愁思催人早韶
光欲去總難留始信人生須趁少年遊

齊天樂

秋感和楊蓉裳先生

離愁不待西風約
年來自驚蕭瑟秦嶺寒雲
隋堤疎柳
同是天涯爲客
華年虛擲嘆書劍飄零
空彈長鋏鏡裏
樊川星星已見鬢邊雪
回思舊游伴侶暮天凝望處
翠嶂千疊一抹雲煙幾家砧杵遙見鴉飛明滅
數聲羌笛記紅蓼灘頭滿山涼月銀漢西流錦鱗無處覓

汪承達

字與里居均示詳

點絳脣

題潘湘雲夢影羅浮遺影

雲散風流美人一去春無主
慰他清苦寫出梅如許
翰墨因緣還結傷心侶
休悵楚豔歌嬌舞轉眼成今古

李

葵

字與里居
均未詳

淒涼犯

蘆花

荻花瑟瑟。江南岸。淒涼一片吹白。此中處士。憑揮玉麈。
素懷誰說。閒雲幾疊。更黃葉丹楓寂寂。是行人。愁堆鬢
髮。飛作一江雪。獨自舟中望。雁宿平沙。鷺飛難識。潮
生遠浦。響西風。便知消息。不是楊花。記當日。曾經送客。
最關情。斷岸小艇。繫夜月。

姚秋槎

名與里居
均未詳

探春令

幾番花信暗相催。早三春將暮。聽杜鵑啼。嬾鶯喉苦。又

滿徑飛紅雨 年年此際拋人去看
惜惜庭宇 賸游絲
一寸飄無主 怎繫得韶光住